

<><><><><><>

PM-Guana Visit

प्रधानमंत्री नरेंद्र मोदी होर रियो डी जिनेरियो च जी-20 शिखर सम्मेलन च हिस्सा लैने दे बाद गयाना दी 3 दिनें दी यात्रा पर उत्थे पुज्जी गेन। 1968 दे बाद भारत दे कुसै प्रधानमंत्री हुंदी एह गुयाना दी पैहली जातरा ऐ। मोदी होर अज्ज संझां जार्ज टाउन च राष्ट्रपति डॉक्टर मोहम्मद इरफान हुंदे'नै गल्लबात करडन, दुए कैरीकॉम-भारत शिखर सम्मेलन च शामिल होंगन ते कैरीकॉम दे सदस्य मुखे दे नेताएं कन्नै बैठकां लाडन। मोदी हुंदा गुयाना दी संसद गी बी संबोधित करने दा कार्यक्रम ऐ। जातरा दरान ओह उत्थे रवै करदे भारती मूल दे लोकें कन्नै मलाटी बी करडन।

<><><><><><>

G-20 Summit

ब्राजील दे राष्ट्रपति लूला डी सिल्वा हुंदे आसेआ दक्खन अफ्रीका दे राष्ट्रपति साईरिल रामाफोसा होरें'गी जी20 दी अध्यक्षता सौंपने दे कन्नै गै कल 19मां जी20 शिखर सम्मेलन संपन्न होई गेआ। अपने समापन भाषणें च राष्ट्रपति लूला डी सिल्वा होरें ब्राजील दी प्रधानता तैहत कीती गेदी बक्ख-बक्ख पैहलकदमिं पर लोऽ पाई। इंदे च भुक्ख ते गरीबी खलाफ वैश्विक गठबंधन दी शुरुआत ते टैक्स पर ऐतिहासिक चर्चा रम्भने, खजाना मंत्रिं ते केन्द्री बैंकें दे एजेंडे च जलवायु परिवर्तन दे मामले गी शामिल करने ते जैविक-अर्थबवस्था बारै पैहले बहुपक्खी दस्तावेज गी मंजूरी देने सरबन्धी मामले मुख न। एहदे अलावा इनें पैहलकदमिं च वैश्विक शासन गी मता असरदार ते बक्ख-बक्ख धड़ें दी नुमाइंदगी आहला बनाने सरबन्धी सुधारें दा आह्वान ते जी20 सोशल दे राहें समाज कन्नै गल्लबात आहली प्रक्रिया रम्भने दे कम्म बी शामिल न। राष्ट्रपति डी सिल्वा होरें आखेआ जे दक्खन अफ्रीका दी प्रधानता दे मगरा हून सब्बनें जी20 सदस्य मुखे घटोघट्ट इक बारी जी20 दी प्रधानता दा तजुर्बा करी लैता ऐ। ब्राजील च लग्गे दा 19मां जी20 शिखर सम्मेलन इस करियै बी खास हा कीजे एह उप्परोतली चौथा ब'रा होग जिसलै इंडोनेशिया, भारत ते ब्राजील ते बाद हून इक होर विकासशील मुख दक्खन अफ्रीका एहदी प्रधानता करन जा'रदा ऐ।

<><><><><><>

Omar Estate Department

मुख्यमंत्री ओमर अब्दुल्ला हों एस्टेट्स विभाग गी आखेआ ऐ जे ओह अगले 15एं बरें लेई लोइचदी सुविधाएं दा इक व्यापक आकलन करै। उनें आखेआ जे इस प्रक्रिया दुरान कराये-भाड़े आहली प्रणाली थमां इक ठोस ते टिकाऊ ढांचे बक्खी मुंतकिल होने पर खास ध्यान केन्द्रित कीता जाहग। एस्टेट्स मैहकमे दी कल लाई गेदी इक जायजा बैठक दी प्रधानता करदे होई मुख्यमंत्री हों निर्माण परियोजनाएं बक्खी ध्यान केन्द्रित करने दा प्रस्तास रक्खेआ ते इक अंतरिम उपास दे तौर पर लौहकी अवधि आस्तै कराये आहली प्रणाली अपनाने दा बी मशवरा दिता। बैठक दुरान मुख्यमंत्री हों एस्टेट्स मैहकमे गी निर्देश दिता जे ओह जम्मू ते कश्मीर खितें च अपनी संपत्तिएं ते उत्थे रवै करदे लोकें दे नाएं आहली सूचियां तैयार करन तांजे इस गल्लै गी जकीनी बनाया जाई सकै जे अलॉटमेंट, योग्यता दी बिनाह पर गै कीती जा। उनें अलॉटमेंट दी प्रक्रिया च पारदर्शिता ते जोआबदेही जकीनी बनाने लेई अलॉटमेंट सरबन्धी सांझे नियम तैयार कीते जाने दी जरूरतें पर जोर पाया ते कन्ने माड़ी हालत च पेदी संपत्तिएं दा निरीक्षण करने दे निर्देश दिते। ओमर हों माड़ी हालत आहली इनें संपत्तिएं च नमें सिरेया जाने भरने दा प्रस्तास बी रक्खेआ।

<><><><><><>

JK-NAS 2024

जम्मू शैहा दे बाहले इलाके चट्ठा च स्थित कृषि विज्ञान ते टेक्नोलॉजी सरबन्धी शेर-ए-कश्मीर यूनिवर्सिटी यानि स्कॉस्ट जम्मू च अज्जै थवां 4 रोजा राश्ट्री कृषि सम्मेलन 2024 दा सरिस्ता कीता जा'रदा ऐ। एहदा मकसद करसानें गी नमिएं तकनीकें बारै जानकारी देना ऐ तांजे ओह इनेंगी अपनाइयै फसलें थवां बेहतर झाड़ हासल करी सकन ते राई-बाई सरबन्धी वैश्विक चुनौतिएं कन्ने बी निब्बड़ी सकन। जम्मू-कश्मीर, पंजाब, हिमाचल प्रदेश, हरियाणा, उत्तराखंड ते केंद्र शासित प्रदेश लद्दाख थमां 15 जहार प्रतिभागी एहदे च हिस्सा लै'रदे न। राई-बाई ते करसानें दे कल्याण सरबन्धी विभाग आसेआ बक्ख-बक्ख मैहकमें ते इदारे दे सैहयोग कन्ने एहदा आयोजन कीता जा करदा ऐ जिंदे च बागवानी, पशुपालन, भिड्डपालन, रेशम, मच्छी पालन ते योजना ते मार्किटिंग विभाग मुक्त तौर पर शामिल न। एह कार्यक्रम उन्नत करसानें, ग्रामीण नौजवानें, महिलाएं, स्टार्टअप्स, साईंसदानें ते होरनें बक्ख-बक्ख धड़ें गी इक्कै सांझे मंच उप्पर आहन्नोग।

<><><><><><>

Kashmir-Trains Services

केन्द्री रेल राज्यमंत्री रवनीत सिंह होरें आखेआ ऐ जे दिल्ली ते कश्मीर बश्कार रेल सेवा, मेद ऐ जे अगले बरें जनवरी म्हीने शुरु होई जाहग। आकाशवाणी दे जम्मू संवाददाता दी रिपोर्ट मूजब, कटरा-रियासी रेल सैक्शन पर जारी कम्में दा जायजा लैने आस्तै, मंत्री होर कल रियासी गेदे हे। ध्यानजोग ऐ जे रेलवे नै पैहले गै दुनिया दे सब्बनै शा उच्चे रेलवे पुल राहें कश्मीर थमां रियासी तगर दिआं कामयाब आजमाईशां करी लैती दिआं न। इस हिस्से पर हून छड़ा तकरीबन 20 किलोमीटर दा गै ऐसा हिस्सा बाकी रेई गेदा ऐ जेहदा कम्म हून अखीरले चरण च ऐ ते मेद ऐ जे एह कम्म बी औंदे दिसम्बर म्हीने सबूरे करी लैते जाडन। मंत्री होरें कल कम्में दा मुआयना करदे होई मेद जाह कीती जे दिल्ली थमां कश्मीर तोहड़ी रेल सेवा अगले बरें जनवरी म्हीने दे पैहले हफ्ते शुरु होई जाहग।

<><><><><><>

Goa-IFFI

भारत दा अंतर्राष्ट्री फिल्म उत्सव अज्जै थमां गोवा च शुरु होआ करदा ऐ ते एह 28 नवम्बर 2024 तगर जारी रौहग। आकाशवाणी संवाददाता मूजब इस बरें 81 मुलखें थमां 180 अंतर्राष्ट्री फिल्मां दस्सियां जाडन। उत्सव दिएं बक्ख-बक्ख थाहें निर्विघ्न ढंग्गै सिर आओजाई लेई मुफ्त ट्रांसपोर्ट दी बवस्था रक्खी गेदी ऐ। गोवा दे मुखमंत्री डाक्टर प्रमोद सवांत होरें कल श्यामा प्रसाद मुखर्जी स्टेडियम जाइयै तैयारिएं दा जायजा लैता ते आखेआ जे उद्घाटन समारोह लेई सब्बै तैयारियां मुकम्मल न। सूचना ते प्रसारण मंत्रालय दे सचिव संजय जाजू होरें आखेआ ऐ जे इस बरें दे फिल्म उत्सव च केई नमीं चीजां जोड़ियां गेइयां न ते एह उत्सव ऐगती युवा फिल्मकारें गी समर्पित ऐ। जाजू होरें गलाया जे इस बरें 100 मुलखें दिआं 400 शा मतियां फिल्मां दस्सियां जाडन। इस उत्सव च फिल्म उद्योग दिआं हस्तियां जि'आं ए.आर. रहमान, आर. माधवन, रकुल प्रीत सिंह ते पंकज कपूर बी शामिल होडन। इस बरें अस्ट्रेलिया गी टकोहदे मुख दे तौर पर सुनेआ गेदा ऐ। गोवा सरकारें इस उत्सव गी बवस्थित ढंग्गै सिर करोआने लेई सुरक्षा सने होरने बी सब्बै लोइचदे बंदोबस्त जकीनी बनाए दे न। एह फिल्म उत्सव, वैश्विक सिनेमा ते सांस्कृतिक आदान-प्रदान दा जश्न मनाने दा इक बड़ा शानदार ते बधिया मंच साबत होग।

<><><><><><>